

Z A K O N
O POVJERAVANJU JAVNIH OVLAŠTENJA

U skladu s članom 23 Statuta Brčko distrikta BiH («Službeni glasnik Brčko distrikta BiH» broj 1/00), Skupština Brčko distrikta BiH na 84. sjednici održanoj 25. februara 2004. godine, usvaja

Z A K O N

O POVJERAVANJU JAVNIH OVLAŠTENJA

I. OPĆE ODREDBE

Član 1

Ovim zakonom utvrđuje se postupak, uslovi i način povjeravanja javnih ovlaštenja udruženjima građana, fondacijama i drugim institucijama u Brčko distriktu BiH (u daljnjem tekstu: pravni subjekti).

Član 2

Pravni subjekti, kojima je povjereno vršenje javnih ovlaštenja, saraduju s državnim organima Bosne i Hercegovine, entitetima, međunarodnim i sličnim organizacijama drugih država, a u skladu s povjerenim ovlaštenjima.

II. POSTUPAK POVJERAVANJA JAVNIH OVLAŠTENJA

Član 3

Vršenje javnih ovlaštenja povjerava Skupština zakonom.

Donošenju zakona iz prethodnog stava prethodi javni oglas, koji raspisuje gradonačelnik, na osnovu svoje ili odluke Skupštine. Pravo učestvovanja na javnom oglasu imaju pravni subjekti iz člana 1 ovog zakona.

Javnim oglasom se utvrđuju vrste javnih ovlaštenja i uslovi pod kojim se ona povjeravaju.

Član 4

Zakonom kojim se povjeravaju javna ovlaštenja propisuju se način vršenja poslova u obavljanju javnih ovlaštenja, način obračuna i uplate prihoda u budžet Brčko distrikta BiH i nadzor nad radom pravnih subjekata u vršenja javnih ovlaštenja.

Član 5

Pravnim subjektima, koji imaju javna ovlaštenja, ne mogu se povjeravati poslovi inspekcijskog nadzora, osim stručnih poslova koji su od značaja za vršenje inspekcijskog nadzora (ekspertize, tehnička ispitivanja i sl.), ako za vršenje tih poslova nadležne institucije Brčko distrikta BiH nemaju tehničke i druge uslove.

III. UPRAVNI NADZOR

Član 6

Upravni nadzor nad radom pravnih subjekata, kojima je povjereno vršenje javnih ovlaštenja, vrše nadležne institucije Vlade Brčko distrikta BiH, a u skladu sa zakonom, odnosno propisom kojim su uređena ta ovlaštenja.

Član 7

U vršenju upravnog nadzora nad radom pravnog subjekta u vršenju javnih ovlaštenja, nadležna institucija ima pravo i dužnost naročito da:

1. provodi inspekcijski nadzor;
2. rješava po žalbama protiv donesenih upravnih akata u vršenju povjerenih javnih ovlaštenja, kada je to utvrđeno zakonom;
3. prema potrebi daje stručna uputstva i objašnjenja za primjenu zakona i drugih propisa koji se odnose na vršenje povjerenih javnih ovlaštenja;
4. preduzima i druge mjere i vrši druga prava koja po zakonu ima drugostepeni organ uprave u upravnom postupku.

Član 8

Pravni subjekti, koji imaju javna ovlaštenja, dužni su da nadležnoj instituciji Brčko distrikta BiH, koja vrši upravni nadzor nad njihovim radom, najmanje jedanput godišnje podnesu izvještaj o vršenju povjerenih javnih ovlaštenja i da, na traženje te institucije, dostavljaju određene podatke i dokumente koji su od značaja za vršenje nadzora u obavljanju javnih ovlaštenja.

Član 9

Ako pravni subjekt, kome su povjerena javna ovlaštenja, ne vrši povjerene poslove u skladu sa zakonom i drugim propisima, nadležna institucija Brčko distrikta BiH, koja vrši upravni nadzor, obavezna je da pismeno upozori organ pravnog subjekta koji vrši javna ovlaštenja i predloži mu mjere za rješavanje tog pitanja, a prema potrebi, obavezna je da preduzme i druge mjere, u okviru svojih prava i dužnosti, kako bi se javna ovlaštenja obavljala u skladu sa zakonom i drugim propisima kojima su ta ovlaštenja povjerena.

Član 10

O žalbama protiv upravnih akata donesenih u vršenju javnih ovlaštenja rješava Apelaciona komisija Vlade Brčko distrikta.

V. ZAVRŠNE ODREDBE

Član 11

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj: 0-02-022-44/04
Brčko, 25. februar 2004. godine

PREDSJEDNIK
SKUPŠTINE BRČKO DISTRIKTA
Mirsad Đapo, dipl. pravnik

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.